



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEEMPAT
MESYUARAT PERTAMA**

K A N D U N G A N

UCAPAN DI BAWAH USUL BERKENAAN PERKARA TADBIR KERAJAAN [P.M. 17]:

- **Isu Penutupan Operasi Markas Angkatan Pertahanan
Awam Malaysia Sungai Siput (U)**
- *YB. Tuan Kesavan a/l Subramaniam (Sungai Siput)* (Halaman 1)
- **Status Tindakan Susulan Penyelesaian Isu Banjir di
Kawasan Parlimen Pengerang**
- *YB. Dato' Sri Azalina Othman Said (Pengerang)* (Halaman 6)

**MALAYSIA
KAMAR KHAS
PARLIMEN KEEMPAT BELAS
PENGKAL KEEMPAT
MESYUARAT PERTAMA**

Khamis, 30 September 2021

Mesyuarat dimulakan pada pukul 2.30 petang

DOA

*[Tuan Yang di-Pertua **mempengerusikan Mesyuarat**]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Isu Penutupan Operasi Markas Angkatan Pertahanan Awam Malaysia
Sungai Siput (U)**

2.34 ptg.

Tuan Kesavan a/l Subramaniam [Sungai Siput]: Terima kasih Tuan Yang di-Pertua. Angkatan Pertahanan Awam adalah satu angkatan yang mana bertindak selaku Sekretariat Pengurusan Bencana di negeri dan daerah. Dalam menangani pandemik COVID-19 yang melanda, APM bersama-sama agensi *frontliners* lain bertungkus-lumus dalam kerja-kerja menangani wabak COVID-19 yang melanda negara ini. APM adalah satu jabatan di bawah Jabatan Perdana Menteri.

Markas Angkatan Pertahanan Awam Malaysia, Unit Sungai Siput Utara telah menutup operasinya pada penghujung bulan Julai 2021 yang lepas atas arahan Ibu Pejabat Angkatan Pertahanan Awam Malaysia atas alasan markas tersebut tidak sesuai dan bangunan tersebut telah uzur dan APM Sungai Siput tidak mempunyai markas kepunyaan sendiri. Dengan penutupan ini, APM Sungai Siput tidak dapat menjalankan perkhidmatan MERS 999 seperti menangkap haiwan berbisa dan menguruskan mangsa kemalangan jalan raya.

Selain itu, pengurusan bencana yang selama ini mereka berikan di Parlimen Sungai Siput lebih lapan tahun sejak APM beroperasi di Sungai Siput. Kesan penutupan markas APM ini, para anggota sukarelawan APM yang bersemangat tinggi memberikan perkhidmatan mereka tidak dapat bertugas memberikan perkhidmatan di Sungai Siput kepada masyarakat setempat seperti sebelum ini.

Yang Berhormat Timbalan Menteri, apakah tindakan kerajaan untuk menyelesaikan isu penutupan Markas APM di Sungai Siput Utara. Ini kerana, Parlimen Sungai Siput adalah kawasan *hotspot* banjir apabila peralihan monsun di hujung tahun seperti sebelum ini.

Bagaimana untuk anggota-anggota sukarelawan ini bertugas jika pihak bertanggungjawab tidak menyediakan markas APM di Sungai Siput untuk mereka memberi perkhidmatan untuk kesejahteraan masyarakat yang terkesan akibat banjir di Parlimen Sungai Siput. Selain itu juga, APM Sungai Siput Utara juga tidak mempunyai kenderaan yang baik untuk mereka beroperasi. Bagaimanakah untuk memberikan perkhidmatan yang terbaik jika kenderaan serta logistik sudah uzur?

Dimohon Yang Berhormat Timbalan Menteri memandang isu ini supaya diselesaikan masalah ini dengan kadar segera. Saya mencadangkan agar pihak kerajaan melalui kementerian yang bertanggungjawab dan dibantu oleh kerajaan negeri bagi mengesyorkan dan menyediakan tanah-tanah kosong sebagai tapak untuk dibangunkan markas APM tidak hanya di Parlimen Sungai Siput tetapi juga markas APM di seluruh negara. Terima kasih Tuan Yang di-Pertua.

Tuan Yang di-Pertua: Ada lagi sebelah itu.

Tuan Kesavan a/l Subramaniam [Sungai Siput]: Oh. Tuan Yang di-Pertua, selain itu pihak kerajaan juga perlu melihat dan memperkasa aset-aset APM seperti kenderaan operasi yang uzur yang mana tidak dibuat perolehan dan perlu diganti bagi melancarkan lagi operasi dan perkhidmatan APM tanpa sebarang kekangan aset dan logistik supaya APM setanding dengan pertahanan awam di negara-negara lain, bagi memperkasakan pengurusan bencana di negara ini yang mana impaknya mutu perkhidmatan yang berkualiti diberikan oleh APM dirasai oleh masyarakat yang terkesan akibat bencana itu sendiri seperti banjir besar pada tahun 2014 yang berlaku. Sekian, terima kasih.

Tuan Yang di-Pertua: Terima kasih. Yang Berhormat Timbalan Menteri.

2.38 ptg.

Timbalan Menteri di Jabatan Perdana Menteri (Tugas-tugas Khas) [Datuk Mastura binti Tan Sri Dato' Mohd Yazid]: Terima kasih Tuan Yang di-Pertua dan Yang Berhormat Sungai Siput.

Yang Berhormat, seperti Yang Berhormat sedia maklum, Pejabat APM Sungai Siput telah ditutup sementara waktu bermula dari 31 Julai 2021. Sebelum ini di Sungai Siput, APM mempunyai kekuatan 58 orang anggota sukarela termasuk pegawai tetap. Statistik kes kecemasan 999 yang ditangani sepanjang tahun 2020 adalah sebanyak 696 kes kecemasan dan bantuan kemanusiaan termasuk banjir kilat.

Sehubungan itu, APM sedang mencari tapak pejabat baharu bagi kegunaan APM Sungai Siput yang berperanan sebagai pusat kawalan operasi unit dan pejabat pentadbirannya. Justeru, APM telah melaksanakan beberapa inisiatif dalam memastikan perkhidmatan APM selaku Sekretariat Jawatankuasa Pengurusan Bencana dapat terus

disampaikan secara lebih efisien. Antara inisiatifnya Yang Berhormat yang dilakukan oleh APM adalah:

- (i) membuat permohonan untuk mengguna pakai kuarters kosong milik agensi-agensi lain dan kerajaan negeri untuk dijadikan pusat pentadbiran dan pengoperasian APM di Sungai Siput;
- (ii) membuat permohonan mendapatkan tanah yang tidak digunakan untuk dijadikan tapak pejabat APM Unit Sungai Siput; dan
- (iii) cadangan menggunakan bangunan komersial bagi tujuan penyewaan.

Walau bagaimanapun Yang Berhormat, bagi memastikan APM Sungai Siput dapat beroperasi sepenuhnya, beberapa keperluan yang diberi keutamaan adalah seperti berikut:

- (i) ruangan pejabat yang boleh menempatkan set peralatan komunikasi bagi kegunaan semasa bencana dan operasi;
- (ii) bilik simpanan yang berperanan sebagai stor daerah bagi tujuan penyimpanan peralatan operasi dan logistik seperti kelengkapan dan aksesori pakaian seragam;
- (iii) ruang meletak kenderaan operasi seperti petak letak kenderaan atau garaj; dan
- (iv) ruang pejabat bagi urusan pentadbiran.

Tuan Yang di-Pertua, pada tahun 2017 APM telah menerima aset yang melibatkan 618 buah bot dengan nilai perolehan sebanyak RM36,689,800 dan 35 buah kenderaan operasi dengan nilai perolehan sebanyak RM11,681,032.03 melalui perolehan dan peruntukan Agensi Pengurusan Bencana Negara (NADMA).

APM sedang membuat perolehan 100 buah ambulans bernilai RM25 juta untuk menambah baik pengoperasian khidmat kecemasan sebagai salah satu agensi penting dalam *Malaysia Emergency Response System 999* dan bagi menampung keperluan ambulans APM di seluruh negara.

Tuan Yang di-Pertua, dengan cadangan pemerkasaan aset ini, sudah pasti APM dapat melaksanakan peranan dan tanggungjawabnya dengan lebih efisien dan lancar. Namun begitu, pertimbangan ini masih tertakluk kepada kelulusan Jemaah Menteri dan kedudukan kewangan sedia ada. Saya pasti perkara ini semestinya akan meningkatkan lagi semangat pasukan dan memantapkan lagi pengurusan sedia ada agar dapat terus berbakti dan memberikan perkhidmatan terbaik serta berkesan kepada rakyat Malaysia.

Pada masa ini, pejabat APM di 159 buah daerah dan Pusat Kawalan Operasi Daerah memerlukan tambahan aset kenderaan atau jentera berat lori jenis MAN dan kenderaan pacuan empat roda terutamanya bagi keperluan di negeri Sabah dan Sarawak. Justeru, kerajaan sedang dan akan sentiasa melihat dan meneliti keperluan-keperluan APM sebagai sebuah agensi yang penting, pengurusan kecemasan dan bencana agar setanding dengan agensi pertahanan awam di seluruh dunia. Terima kasih Tuan Yang di-Pertua.

Tuan Yang di-Pertua: Terima kasih Yang Berhormat.

Status Tindakan Susulan Penyelesaian Isu Banjir di Kawasan Parlimen Pengerang

2.42 ptg.

Dato' Sri Azalina Othman Said [Pengerang]: *Bismillahi Rahmani Rahim. Assalamualaikum warahmatullahi wabarakatuh.* Terima kasih Tuan Yang di-Pertua.

Pada bulan Januari 2021, Parlimen Pengerang telah dilanda dengan musibah banjir. Para penduduk terpaksa mengharungi dua gelombang banjir dalam tempoh dua minggu iaitu gelombang pertama pada 2 dan 3 Januari 2021 dan gelombang kedua pada 10 dan 11 Januari 2021. Saya telah mengemukakan aduan berkenaan kejadian banjir yang berlaku di beberapa buah kawasan di Parlimen saya setelah menerima beberapa laporan daripada wakil kawasan setempat. Para penduduk perlu menanggung kerugian yang banyak setiap kali kejadian ini berlaku. Antara kawasan yang terjejas teruk adalah seperti berikut:

- (i) Taman Bayu Damai;
- (ii) Kampung Sungai Kapal Lama;
- (iii) Kampung Bukit Buluh;
- (iv) Kampung Pengerang;
- (v) Kampung Lepau;
- (vi) Kampung Bukit Raja; dan
- (vii) Kampung Teluk Ramunia.

Justeru, saya telah juga mengeluarkan jemputan rasmi kepada Yang Berhormat Senator Dato' Dr. Ahmad Masrizal Muhammad, Timbalan Menteri Alam Sekitar dan Air, Kementerian Alam Sekitar dan Air (KASA) pada 8 Februari 2021 untuk mengadakan sesi lawatan tapak ke kawasan terjejas. Lawatan ini turut disertai oleh pihak Jabatan Pengairan dan Saliran (JPS) yang telah juga mengadakan sesi taklimat cadangan penyelesaian bagi mengurangkan risiko banjir ini.

Tuan Yang di-Pertua, walau bagaimanapun, sehingga kini pihak saya masih belum menerima apa-apa maklum balas berkenaan sebarang kerja-kerja baik pulih atau pembaikan yang akan dimulakan. Saya dimaklumkan sepertimana yang dilaporkan menerusi kenyataan Astro Awani bertarikh 20 Februari 2021, bahawa sejumlah RM15 juta telah diperuntukkan bagi tujuan kerja-kerja membaik pulih saliran dan kerja-kerja berkaitan sekali gus mengelak kejadian sama berulang.

Tindakan yang diambil dapat membuktikan kepada rakyat keprihatinan kerajaan dalam menyelesaikan masalah yang diutarakan. Tambahan pula, masalah ini sering kali berulang dan menjadi isu hangat setempat terutamanya di kawasan Taman Bayu Damai dan Kampung Teluk Ramunia.

Sehubungan itu, saya dengan rendah hati ingin memohon pihak Yang Berhormat Timbalan Menteri memberikan maklum balas berkenaan status perkara ini serta pertimbangan untuk mempercepatkan tindakan yang telah dijanjikan ini supaya kejadian sama tidak berulang lagi. Sekian sahaja. Ribuan terima kasih saya ucapkan kepada Tuan Yang di-Pertua dan Yang Berhormat Timbalan Menteri.

Tuan Yang di-Pertua: Terima kasih Yang Berhormat. Silakan Yang Berhormat Timbalan Menteri.

2.45 ptg.

Timbalan Menteri Alam Sekitar dan Air [Dato' Mansor bin Othman]: Terima kasih Tuan Yang di-Pertua dan Yang Berhormat Pengerang. *Bismillahi Rahmani Rahim. Assalamualaikum warahmatullahi wabarakatuh.*

Tuan Yang di-Pertua, untuk makluman Yang Berhormat, Kementerian Alam Sekitar dan Air mengambil berat dan melahirkan rasa simpati akan masalah banjir yang berlaku di beberapa kawasan penempatan dalam Parlimen Pengerang. Dalam hal ini, langkah menangani masalah banjir yang diambil oleh KASA melalui Jabatan Pengairan dan Saliran (JPS) melibatkan tindakan jangka pendek dan juga jangka panjang. Tindakan jangka pendek melibatkan kerja penyelenggaraan parit, sungai dan naik taraf pintu air dan ban untuk memastikan kelancaran air tatkala musim hujan melibatkan peruntukan kerajaan negeri berjumlah RM294 ribu.

Kawasan terlibat ialah Taman Bayu Damai, Kampung Teluk Ramunia dan Kampung Bukit Raja di mana kerja-kerja berkaitan telah siap pada April dan September 2021. Manakala, kerja-kerja naik taraf pintu air dan ban di Sungai Lepau dijangka siap pada November 2021.

Penyelesaian jangka panjang melibatkan dua langkah utama iaitu:

- (i) Kajian Pelan Induk Saliran Mesra Alam Pengerang Johor Darul Takzim dengan kos kajian berjumlah RM3.75 juta dan dijangka siap

pada Ogos 2022. Kajian ini bertujuan untuk mengenal pasti punca kejadian banjir kilat dan sebagai rujukan perancangan infrastruktur saliran serta penyelesaian secara komprehensif bagi menangani kejadian banjir kilat; dan

- (ii) projek untuk mengatasi masalah banjir di Kampung Sungai Kapal Lama dan lain-lain kawasan di Pengerang dengan anggaran kos berjumlah RM15 juta. Projek ini dalam proses pemurnian terma rujukan bagi perkhidmatan perunding, reka bentuk terperinci dan projek dijangka siap pada tahun 2024.

Tabiat suka membuang sampah ke dalam longkang juga menyebabkan kejadian banjir kilat. Dalam hal ini, KASA ingin mengalu-alukan pelaksanaan segala program bersama dengan Yang Berhormat dan semua Ahli Yang Berhormat untuk mengadakan program kesedaran contohnya di kawasan masing-masing untuk mengubah sikap dan tingkah laku penduduk ke arah memelihara sungai dan juga alam sekitar.

Dalam pada masa itu, KASA juga ingin memohon kerjasama setiap kerajaan negeri untuk memastikan tiada aktiviti pembuangan dan penempatan di kawasan rizab sungai. Langkah kerjasama ini perlu kerana mengikut Perlembagaan Persekutuan, bidang kuasa terhadap sungai juga terletak di bawah kerajaan negeri. Sekian, terima kasih Tuan Yang di-Pertua.

Tuan Yang di-Pertua: Terima kasih Yang Berhormat Timbalan Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga 2.30 petang hari Isnin, 4 Oktober 2021. Saya tangguhkan sidang ini. *Assalamualaikum warahmatullahi wabarakatuh* dan selamat sejahtera.

[Kamar Khas ditangguhkan pada pukul 2.49 petang]